



TAARIFA KWA VYOMBO VYA HABARI

TANZANIA NA UJERUMANI KUANDAA ONESHO LA DAINOSARIA

Wizara ya Maliasili na Utalii kupitia taasisi ya Makumbusho ya Taifa kwa kushirikiana na Makumbusho ya Elimu Viumbe ya Naturkunde ya Berlin, Ujerumani inapanga kufanya maonesho makubwa ya dainosaria (mjusi mkubwa wa ajabu) na urithi wa asili nchini Tanzania mwaka huu (2020).

Maonesho hayo ambayo yanaandaliwa na Makumbusho ya Elimu Viumbe ya Naturkunde ya Berlin, Ujerumani kwa kushirikiana na Makumbusho ya Taifa la Tanzania yanalenga katika kutoa elimu kwa wananchi kuhusu urithi wa asili na maliasili zilizopo Tanzania pamoja na kukuza utalii wa ndani na nje. Maonesho hayo yanayofadhiliwa na Wizara ya Mambo ya Nje ya Ujerumani ni fursa muhimu kwa Watanzania na wageni kutoka nje kujua kwa undani kuhusu dainosaria, wanyama ambao wameishi duniani na pia hapa Tanzania zaidi ya miaka milioni 100 iliyopita.

Katika maonyesho hayo nchi ya Ujerumani itahusika kutoa nakala ya mjusi mkubwa ajulikanaye kitaalamu kama *Brachisaurus brancai (Giraffatitan)*, kusafirisha, kujenga na kutengeneza maonesho hayo na kuhakikisha kuwa vifaa vinavyotumika kutengenezea maonesho hayo yanaandana na hali ya hewa ya Tanzania. Vile vile, maonyesho hayo yanalenga katika kukuza utalii wa ndani na kuvuta zaidi watalii kutoka nje ili waweze kujionea maeneo ambapo wanyama hawa wa kihistoria walipatikana katika nchi yetu.

Mabaki ya wanyama hawa yalianza kupatikana katika maeneo ya Tendaguru Mkoa wa Lindi, na hivi karibuni yamepatikana katika bonde la Ruhuhu mkoani Ruvuma, na bonde la Rukwa mkoani Songwe. Maonesho hayo pia yatakuwa na manufaa ya mafunzo, utafiti na fursa za kielimu kwa watumishi watakaoshiriki katika nyanja za utunzaji na uhifadhi wa mikusanyo mbalimbali ikiwemo mabaki ya wanyama hao.

Tanzania ni miongoni mwa nchi chache duniani zilizotoa masalia ya dainosaria ambayo yanatoa mchango mkubwa katika kufahamu elimu ya viumbe na mazingira ya kale duniani. Upatikanaji wa masalia ya dainosaria huko Tendaguru mkoani Lindi ulisababisha kuvutia watafiti wa mambo ya kale kutoka vyuo na taasisi mbalimbali duniani kuja kufanya utafiti nchini. Kutokana na matokeo mazuri ya tafiti hizi, kumewezesha kupatikana masalia ya dainosaria kwenye mikoa mingine kama vile mkoani Songwe na Ruvuma.

Kwa mawasiliano zaidi, tafadhali wasiliana na:

- Makumbusho ya Taifa la Tanzania, Mkurugenzi Mkuu, Simu :+255 22 2130112 na +255222122030 , Barua pepe: dg@nmt.go.tz
- Ubalozi wa Ujerumani: Emmanuel Mtingwa, Afisa Mawasiliano, Simu ya Mezani: +255 22 2212-313, Simu ya mkononi : +255627923332, Barua pepe: pr-100@dare.diplo.de